





開有益齋讀書志卷二目

史部

地理

輿地紀勝

嚴州圖經

乾道四明圖經

淳祐臨安志

景定建康志

咸淳毘陵志

至元四明續志

大德昌國志



金陵新志

洪武京城圖志

昌國典詠

山水

潮蹟

古迹

祠山事要

海昌勝覽

靈谷寺志

雜記

金陵六朝記

六朝事迹編類

金陵待徵錄

游紀

游志續編

異域

紀古滇說集

安南志略

職官

南雍志



政書

中興禮書續中興禮書

壇廟祀典

目錄

千頃堂書目

拜經樓藏書題跋記

隋書經籍志考證

金石

元牘記

開有益齋讀書志卷三

上元朱緒曾述之

輿地紀勝

王象之輿地紀勝二百卷余假鈔於錢塘許子淥

延潤

蓋周生先生鑑止水齋藏書也子目十二曰府州沿革

風俗形勝景物上下古迹官吏人物仙釋碑記詩四六

其闕卷與錢辛楣養新錄所見同錢氏云象之字儀父

金華人嘗知江甯縣自序云少侍先君江淮荆閩靡國

不到仲兄行父西至錦城叔兄中甫北趨武興南渡渝

瀘錢氏據陳直齋證其兄觀之為夔路漕則中甫疑卽



觀之又記一書稱王益之字行甫即儀父之仲兄而其父名無從考矣緒曾按象之父名師古見元吳師道敬鄉錄云王師古字唐卿金華人紹興甲戌進士嘗為南劍州學教授刊龜山遺書守九江建拙堂於濂溪祠側歷仕州縣皆有治績除廣東提點刑獄卒有文集及資治通鑑集義八十卷呂忠公誌墓忠公乃呂祖子謙之恭之益之觀之象之渙之節之又云王益之字行父瀆熙丁未進士仕至大理司直著職源五十卷西山讀書記屢引其端益之有西漢年紀永樂大典收之王謙之字吉甫瀆熙甲辰進士王象之字肖甫慶元丙辰進士博學多識著輿

地紀勝敬鄉錄載益之職源序象之輿地紀勝序又按景定建康志江甯縣壁記題名知縣自紹興元年樂某至景定元年王鏜無象之名未識其何年任也千頃堂書目王觀之輿地圖海縣獄記

嚴州圖經

嚴州重修圖經紹興己未知軍州事董弁序此舊序也紹興丙午迪功郎州學教授劉文富序此重修序也冠以太宗初領防禦使詔太上皇帝即高宗初授節度使制乃建隆元年太宗為睦州刺史封天水縣開國子宣和三年高宗授遂安慶源等軍節度使進封康王也次子



城圖建德府內外城圖府境總圖建德[涇]安桐廬遂安  
壽昌分水各縣境圖以嚴州及六縣分卷各列子曰其  
體例與寶慶四明志同今惟嚴州建德[涇]安三卷存[涇]  
安爲新安郡治隋置睦州故[涇]安一卷獨詳唐刺史李  
道古撰大廳記具錄唐代顯慶以來刺史名宋雍熙二  
年知桐廬縣刁衍續至太平興國三年足資考證勞季  
言云唐書儒學傳張後[允]遷燕王府司馬出爲睦州刺  
史此脫燕字宰相世系表柳範子齊物睦州刺史元和  
姓纂同此脫物字又張愿天寶三載韋南金天寶五載  
俱自台州刺史拜赤城志刺史失其名董弁有嚴陵集

九卷取嚴州題詠序記別爲一書輔圖經而行錢辛楣  
養新錄云陳直齋馬端臨俱稱新定志不云嚴州圖經  
然董弁創爲嚴州圖經劉文富奉知州陳公亮之命重  
修仍其名實卽一書余謂景定中郡守錢可則教授鄭  
瑤學錄方仁榮撰新定續志新定乃郡名非新舊之義  
陳直齋因續志名新定亦以劉文富書爲新定志也嚴  
陵集與景定新定續志余俱有其書此書三卷係宋刻  
可與乾道臨安志共傳余更有宋談鑰嘉泰吳興志凌  
萬頃玉峰志俱罕觀之笈



乾道四明圖經十二卷宋乾道五年直秘閣知明州張  
津撰首有縉雲縣主簿三山黃鼎序云得舊錄更加採  
摭著爲七卷又以篇什碑記等爲五卷附於末原書無  
專刻明鄭真編入四明文獻集後人采而出之始有鈔  
本其敘人物鄭雲以劉儁事獄死旌表門閭盧敘鄧處  
士弟犯公憲自殺乞代可考見會稽典錄之佚文徐浩  
乾元二年進廣孝經十卷授校書郎特辨云非徐季海  
也最爲明晰其詩篇碑記尤多寶慶諸志之所遺眾樂  
亭詩今賀監祠中其碑雖存剝蝕過半獨此書所載邵  
必記及各詩爲全

淳祐臨安志

吳氏拜經樓藏書題跋記淳祐志六卷從季滄葦補鈔  
咸淳志第四至九卷有稱理宗爲今上語應是施諤淳  
祐志扉入平湖韓氏臨安志四冊書凡六卷所列山川  
城府二門紀載至淳祐十一二年止避諱亦僅及理宗  
其爲淳祐志無疑殆卽從季氏轉錄者其時知臨安府  
爲趙與憲也吳槎客所藏未及借閱余借鈔勞季言所  
藏胡書農學士藏本淳祐志四冊不分卷數標題封域  
建置沿革疆界城郭山川池塘堰塍埂橋梁風俗形勝  
戶口稅糧商稅課鈔土產一冊寺一冊院觀二冊每門



以各縣為次與吳氏及犂經室外集所云山川城府二門有異明慶寺云今上皇帝嘉熙四年七月旱躬致款謁回鑾撤蓋甘雨隨沛咸道志云理宗皇帝回鑾撤蓋咸道志作於度宗時故稱理宗也寶嚴寺院今上皇帝道祐三年賜僧智光御書晦庵字也道祐志今存者惟寺院最詳非特多吳之鯨等撰武林梵刹志所未引亦多咸道志所未及昭貺廟載宋張夏治海塘事極備

景定建康志

宋溪園先生周應合道叟為留守馬光祖華父撰建康志五十卷明南雍藏版散佚陽湖孫星衍淵如以總督

費公道所藏本重梓行世張月霄愛日精廬藏書志嘗言其訛脫數處余於壬子購得宋刊本卷十三表孫刻

少宣和元年己亥至七年乙巳宋刻元年己亥王漢之

事再至盜發青溪橫潰四出聲搖江東起漢之知府事

其經術政理文詞字畫當時皆號第一二三年丙午十月

州妖賊方臘反正月十九日詔金陵乃喉襟之要當占

據江甯守把鎮江次議討賊時王稟已守楊子江口劉

德縣劉延慶卻守金陵劉鎮移廣德軍楊可世赴宣州

合兵討擊五月六日臣僚言陸賊猖獗大兵奉行天討

五月八日宣撫司奏江浙被賊曾經焚劫處並合增修城池無則創築詔修江甯府城壁仍招置賊既平民方還業非屯戍兵鎮遏無以潛消凶暴今措置已於江東路留戍兵七千九百六十人分在江甯府等處其軍並隸



本路安撫統轄訓練四年戊申五年己酉廬襄以徽猷閣待制知府事四月十一日江西南東西路置提舉鹽事官於江甯府置司六年庚戌七年辛亥襄移知湖州九月二日襄奏請罷丹陽固城石臼三湖為圩田及言開銀林河為不切之務詔陞顯謨閣直學士御筆王安石輔相神考建立法度弟安國安上安禮亦曾被遇先帝今其家間頗零替可特推恩二房見居二十一卷長人與除初等職名王樸王稅並除直祕閣二十一卷城闕志四十葉以下先後次序紊亂四十葉季語告下應接勿替此心朝斯夕斯燕興一堂無愧此顏是答己知孫刻心誤作必在四十九葉今據宋本存心堂吳別齊梁士林館宋儒學館宋招隱館宋四方館宋商飈館齊橫江館高齋學齋昭文齋式敬齋紬書齋江甯館通江新下當接宜侈其館終馬涼館輪奐一二十二卷半山園在今報甯禪院是其地王荆公營居半山園文未完刻

王荆公營居半山園有詩示蔡天啟備述其事所謂今年鍾山南隨分作園圃者是也又有次吳氏女子詩注云南朝九日臺在孫陵曲街傍去吾園只數百步舊志繡春園在府社壇東隸運司端平二年高公定子作記也問遺址亦未如何所客為予言繡春馬所取名子謂之日繡衣春當香漢立絲服日向庭闈趨乃杜少陵入春行之句此嘉名也吾欲堂而顏諸司存造船場有餘地鄰亦願益以廢圃乃庚之拓而新之匪事游觀其所以示興廢之一也端平二年九月臨邛高定子瞻叔識卷二十九儒學志二建明道書院宋本云明道先生程子及先賢傳師濂溪先生周子慨然有求道之志窮性命之理率性會通體道成德自孟子沒聖人之學不傳先生生於四千年之後得不傳之學於遺經志將以斯道覺人天不愁遺哲人蚤世嘗為上元主簿且攝縣



事政教在人至今思之因人心之所思而明先生之教  
此書院所由建也孫刻本迥然不同孫版歸甘祺王家

余據宋本郵寄之祺壬欣然補刻誠快事也金陵兵燹  
祺王之弟星如來杭言書版俱燬余幸存副本於篋中

因備錄之以俟再梓藏書志於二十一卷舛誤未載余  
細校乃得之常南陔中丞亦藏舊鈔一部今並不可問

矣 文瀾閣本與宋本同此以知孫刻之宜正也南雍志景

定建康志二十六本宏治年間錄補  
尚有闕篇版存者七百五十九面

咸淳毘陵志

咸淳毘陵志三十卷四明史能之撰史能之進士宋史史彌鞏

子肯之能之有自序云毗陵有志舊矣淳祐五年尉武

進時宋公慈為守俾鄉大夫增益之書成且有日越三

十年余承朝命長此州取宋公未竟之書於常簿季公

之家訛者正之略者備缺者補蓋閱旬月而后成咸淳

四禩月正元日四明史能之敘考卷八秩官宋慈嘉熙

四年十一月任淳祐二年四月改知贛州未任罷淳祐

五年九月守為王鎔此敘五年乃元年之訛又秩官史

能之咸淳二年十二月朝奉大夫太府寺丞出守自淳

祐元年至咸淳二年凡二十六年若淳祐五年至咸淳

二年僅二十二年蓋舉成數耳首列郡治郡城郡境晉



陵武進無錫宜興四縣境爲圖七自二卷以下地理詔  
令官寺秩官文事武備風土祠廟山水人物詞翰財賦  
仙釋觀寺陵墓古蹟祥異碑碣紀遺合圖爲二十門地  
理古今郡縣表頗稱詳核荆溪引前漢地理志實爲中  
江溪貫邑市受宣歙蕪湖之眾流注震澤達松江以入  
於海風土記云陽羨溪九僅有六餘不知其處子隱時  
已如此則川源之湮塞可知此與景定建康志所云俱  
可爲中江之證又邗溝辨援左傳吳城邗溝通江淮云  
前輩於邗字下點斷而斷築城與溝兩事今毗陵是一  
邗溝與左氏所載不同又百瀆口謂舊志載瀆名僅七

十有二悉在宜興然晉陵新塘鴟步村實號百瀆口詳  
疏百瀆之名如此之類俱極精確舊志指祥符圖經無  
錫將軍堰祥符經云唐將軍單雄信提兵道此以鎗止  
水爲堰故名此舊志之紕繆未盡刪削也宋時秩官科  
第人物姓名尤資考證此書爲延祐丁巳教授李敏之  
所重刊嘉慶二十五年武進趙舍人懷玉得鈔本刻於  
南海惟少卷二十詞翰中表書記三類惜元謝應芳續  
志十卷不可得卷二十二唐李郢邵博士溪亭秋晚寄  
題陸勳校書義興禪居詩茶山貢焙歌在盧仝後曹松  
前卷二十三陳克陽羨春歌在張安國後尤袤前此卷



皆宋人輯唐詩者亦以陽羨春歌為李郢詩非也宜興

暉父惟良領州刺史因家陽羨暉從蘇文忠遊自謂雙  
楠居士王平甫寄詩云坐唱月華青嶂外行吟風起白  
鷗邊元簿字泉鄉自號耘軒有歲後書懷云他鄉故鄉  
老若此新歲舊歲窮依然烹茶但有二升水沽酒初無  
三百錢寓賢陳克有詩  
名寓居義興之潼渚

至元四明續志

至正續志十二卷慶元路太守王元恭續清容居士袁  
桷之志也考鄭真滎陽外史集遂初老人傳知此書為  
王厚孫所作載其始末甚詳曰老人姓王氏名厚孫字  
叔載署郡直學與吏輩不合拂衣去李僉憲綱強起之  
塗田在鄞沙岸在昌國為豪民侵奪力陳其事皆得復

廩粟有餘例歸職掌老人獨輸於公秩滿授象山教諭

袁文清所撰四明志或有讒於僉憲沙木斯鼎將毀其

版老人白之王太守元恭曰袁公中朝名臣書法高古

不可毀也太守持書以進僉憲驚悔命與舊志並行屬

老人成續志若干卷厚孫為宋尚書應麟伯厚之孫應

奎翁翁洲書院云郡守王元恭敬父下車創意庶務弊

易廢舉飭庠序政教志愈篤知恭字敬父賢守也杭大

萬編修經修明州志詩云自宋訖命更延祐袁桷方領  
編修官又云誰其續者垂不刊猗惟王侯元恭捉翰適  
如椽亦不知出自厚孫手也

大德昌國志



大德昌國州圖志七卷元昌國州判官潼川馮福京鄞縣教諭郭薦撰卷中學校云歸附後元貞乙未州判官馮福京始至首勉學之士協力修理州判記自署云潼川馮福京翁州書院云州判官馮福京記舟山志亦云福京其作復京者誤也又小學云元貞乙未州判官馮福京重行修蓋請鄉之耆宿郭薦應季挺任教導是郭薦卽昌國州人志未有郭薦等申繳文牒則此書實出郭薦手戶口田糧引舊志宋紹熙舊志此宋時昌國一縣之志在乾道寶慶開慶四明志之外名之僅存者也此書得失余於昌國典詠詳言之千頃堂書目有明陶恭昌國縣志五卷明何汝賓舟山志尙有傳本陶志不可見矣

金陵新志

至大金陵新志十五卷元奉元路學古書院山長光州張鉉用鼎撰余舊見孫鼎如觀察所藏係元版明印卷一江甯縣圖考溧水州圖冶城古迹圖考曹南王祠堂圖並考皆闕後借鈔 文瀾閣本則孫闕者亦闕卷五下婁湖以下之類則孫氏有者亦闕余因遍求藏書家見當湖錢夢廬所藏差勝然亦無曹南王祠堂圖嗣至金閶見汪氏士鍾所藏爲元時所印特完全凡圖中小



字厯厯可填矣。如觀察得此書於五柳居陶氏跋爲難得之書。余又求之積三十餘年。竟得善本。何其快也。是書雖爲十五卷。卷三分上之上。上之中。上之下。中之上。中之中。中之下。下之上。下之中。下之下。上下卷十一。上下卷十二。上下卷十三。上之上。上之中。上之下。下之上。下之中。下之下。連子卷數之得三十一。卷參差不一。故詳載之。使覽者檢其全也。前列新舊志引用書目。然陶宏景古今州郡記。帝代年。歷蕭大圖梁舊事。庾季才地形志。明克讓古今帝代記。丹陽尹傳之類。元時未必存。亦未見引用。又金陵百詠注。曾極陳崑二家曾

詩見景定志。陳崑百詠新舊志不見一首。何以虛列其目。圖考如金陵圖臺城古迹圖。最古可補景定之遺。顧文莊客座贅語二圖。取於此書也。曹南忠宣王左丞相阿勒哈句容武毅王圖。圖爾哈爲元初功臣及儒生古之學。宋儒籍諸家非見此志。莫能詳人物志世譜分郡姓游宦封爵。白漢至宋列姓名注。世系永嘉南渡王謝久成土著。當入於郡姓。但唐李靖虞世南殷開山南唐林仁肇宋樂史馮玠亦列郡姓。未免繁濫。余嘗謂金陵志乘六朝取建康實錄。宋事取景定志。元事取至大志明事取洪武京城圖志。金陵世紀。應天府志。以一代之



詩書志 卷三  
書考一代之事確實可據也

洪武京城圖志

此明洪武初應天府京城圖志也首有承務郎右春坊右贊善王俊華記次爲皇都及敘楚威王秦始皇吳晉宋齊梁陳隋唐南唐宋沿革目錄分宮闕城門山川壇廟官署學校寺觀橋梁街市樓館倉庫廐牧園囿十三門其有圖曰京城山川圖大祀壇山川壇廟宇寺觀圖官署圖國學圖街市橋梁圖樓館圖其文簡括明初建國規模瞭然在目鏤刻精工字仿趙松雪體共六十葉每半葉十行滿行十九字篇幅寬闊字大悅目其樓館

圖在城內者南市北市在城北在聚寶門外者來賓重譯在清涼石城三山門外者曰鼓腹謳歌鶴鳴醉仙集賢樂民梅妍翠柳輕煙澹粉共十四樓與陳魯南金陵世紀合晏鐸春夕詩花月春風十四樓楊升庵藝林伐山數樓名有清江石城而遺南市北市胡元瑞謂金陵有十六樓今按此圖清涼門外卽鼓腹樓石城門外卽謳歌樓且諸樓皆別立名何獨以石城清涼二門名其樓似爲不倫然則十四樓宜以南市北市爲正至李泰十六樓詩亦有清涼石城或此二樓後建故世紀亦不數之也若駱駝亭在靈谷寺西南則爲靈谷寺志者所



未知矣姚世昌謂湯文振廣爲帝里書更不可得見此圖志是明初印本古香觸手與宋元佳刻無異

### 昌國典詠

道光丙午余至舟山縱覽山川形勝關隘烽埃與搢紳耆老往復討論繆蓉浦定海縣志莊對樵定海續志記載雖詳罕徵古籍爰取寶慶四明志大德昌國州志正其舛漏復采乾道四明圖經開慶延祐至正諸志及舟山志以古證古列其同異更爲旁稽博攷附近聞詩以紀事積而成帙昔張逸問鄭君山川能說鄭君答曰兩讀或言說說其形勢也或曰述述者述其故事余是編

竊取二義因名曰昌國典詠有所不知蓋闕如也

### 潮蹟

潮蹟一卷宋朱中有撰中有同安人有嘉定甲申自序生長海濱往來錢塘五十年故是書論錢塘之潮以燕肅沙渾之說爲是而力辨盧肇賦晦絕朔興抱朴子夏大冬小春起秋落之非並及陸廣微邱光庭鄭遂洽聞之誤設爲問答凡十七條鄭遂洽聞者晁氏讀書志洽聞記三卷唐鄭當時撰記古今神異詭譎事凡百五十六條或題云鄭遂此書云鄭遂洽聞也朱氏大指謂水天地之血元氣有升降氣之升降血亦隨之潮二十四



況隨二十四氣末爲賦一篇以正盧賦之訛名之曰潮  
蹟蹟深也探蹟索隱之義此本爲汪氏振綺堂藏書從  
姚仲芳借鈔近時海昌周春潮說三篇援引甚博潮蹟  
實爲之先導勞季言云張湜會稽續志全引潮蹟此乃  
單行本也可以互校

### 祠山事要

祠山事要指掌集十卷廣德張眞君渤祠志也元貞乙  
未前中奉大夫梅應發序云舊有顯應集世家編年及  
嘉熙乙亥周秉秀正訛類編爲八卷乙亥以後則梅所  
續也應發宣城人曾爲開慶四明續志此序題前中奉

大夫乃仕宋時官階也顏眞卿橫山廟碑云其先名秉  
佐夏禹治水遇神女生男授秉曰子孫相承當世世血  
食吳分先時天西大裂有聲如雷有電如龍識者謂必  
生神人公果應之據此眞君爲夏時人然封爵以秉爲  
眞君之祖父謂眞君生於西漢宣帝神爵癸亥相去二  
千年不應僅傳三世所莫能詳也書中載楊吳南唐時  
事最詳咸通六年孫儒寇宣州楊行密命其將田頽領  
甲士五千人於廣德禦之值積雨所苦儒禱廟無應錢  
塘命將沈璨助儒令璨在縣東二十五里下三寨截斷  
輕運頽選勇敢士五百人夜斫沈寨行二十里遇雨晦



詣廟啓禱王默授以五更初進軍擒沈璨斬之孫儒事  
與史合斬沈璨事此書爲詳吳天祐十年吳越騎圍城  
見城上甲士千重矢鏃如雹潘統軍引去保大十四年  
二月吳越行軍都統吳延賞將入宣城並廣德屯兵杏  
潭南唐擒得彼界覘者凌鏞三月十二日制置使陳令  
儀差卒張進往宣城詣指揮使施仁望所偵聞事宜二  
十日錢塘兵至宣城攻城見綠雲亭之兵騎而野其統  
軍吳延賞以爲援兵至引去四月四日知潤州燕王送  
祀文其結銜云副元帥鎮海甯國等軍節度使兼管內  
營田觀察處置等使特進守侍中潤宣等州大都督上

柱國食邑七千戶燕王按燕王爲元宗太子宏冀馬陸  
書宏冀傳云徙鎮潤州封燕王據此知潤宣等州大都  
督馬陸云齊王景達爲副元帥據此知宏冀亦爲副元  
帥也如此之類可與五代史馬陸南唐書相證其冊命  
祝文俱爲全唐文所未載卽劉金門五代史註周雪客  
南唐書注亦未能引及至若唐宋元碑記唐顧蒙宋何  
夷素成悅潘悅姚舜諧張賁陸元光湯耘之趙希仁林  
棐趙與訾洪邁沈濬湯景仁胡庶張競辰元吳孟陽存  
者尤夥不獨馬廷鸞一紀爲碧梧玩芳集之佚文也

海昌勝覽



海昌勝覽二十卷海昌周春撰春字芑芑號松靄晚號  
黍谷居士乾隆甲戌進士岑溪知縣嘉慶庚午重赴鹿  
鳴卒年八十六有松靄遺書行世其十三經音略杜詩  
雙聲疊韻括略小學餘論爲最著此書未刊手稿藏寶  
綸堂許氏許氏之子鴻逵爲錢警石學博弟子余因警  
石假鈔一部欲考知海昌事實莫備於是書凡詩三百  
六十首詩後徵引極富詳述本末稽考異同葛繼常跋  
謂條注粘貼遺脫管芷湘庭芬又獲葛本所無余既錄  
副又屬管芷湘應笠湖諸君重加補輯於是勝覽一書  
余所錄爲最詳松靄又有海昌掌故錄十二卷海神廟

志一卷

靈谷寺志

甘實庵大令輯靈谷寺志成體例分明辨證博洽其大  
指在抉擇醜雅而不語怪也白明祖廢鍾山舊寺併入  
靈谷卜獨龍阜爲陵寢徙寶公塔於屏風嶺下規模宏  
敞凡鍾山名勝悉萃於茲寺中矣嘉靖時釋可浩創有  
志略 國初釋曉蒼踵成之顧中多踏誤覽者微有憾  
焉夫靈谷以寶公名而寶公非雲光達摩比也李延壽  
修南史擇言雅馴列寶公與陶貞白於隱逸蓋嘗論之  
六代之閒干戈雲擾變如弈棋達觀洞識之士恆遠引



於圭組之外貞白挂冠神虎寶公著屐都市原不待梁武之世而始翛然高蹈也梁公以禮接士故二人時與往來然窺其太平日久侈心漸萌於是昭陽之殿貞白題之壽陽之師寶公歌之俱負前知之鑒如合符券人以其神妙不測遂僅僅以術數稱而不知其爲隱君子也寶公靈著鍾山較貞白爲更顯後世讀其讖記謂其定數之不可逃豈知其定理之不可易哉至志中謂寶公託跡齊梁而對北魏胡后語者別有寶公宋史五行志云江南伏龜山下寶公墓中得詩碣與葬鍾山不合引高僧傳諸書以斷其非刊訛正謬皆有根據尤非率爾操觚者比矣實庵家有藏書數萬卷金石鼎彝充軻璀璨且自東晉以來世居金陵爲舊族習知故事一志特著述之小者耳而能不冗不濫刊俗語之丹青歸於雅正豈獨爲山靈出色已乎故揭其旨趣而爲之敘

金陵六朝記

金陵六朝記二卷唐尉遲偓纂偓有中朝故事一卷題朝議郎守給事中修國史驍騎尉賜紫金魚袋臣尉遲偓奉旨纂進此書每朝末云至唐景福三年甲寅歲凡幾年按唐昭宗景福止二年其甲寅歲改乾符元年偓仕於南唐烈祖李昇昇自言系出唐吳王恪都金陵故



偃奉命纂中朝故事又述孫吳大帝至陳後主六朝世系帝王建元陵墓宋張敦頤六朝事迹中六朝興廢一類與此書合惟所載皇后妃丞相將軍儒學諸人但有姓名無事迹畫及藝術神仙或詳其事體例未當又多舛譌姑舉吳一代言之丞相失載萬彀而張悌後又復出濮陽興儒學有岑昏昏乃邪佞何嘗有學又列龐統孔文舉更與吳不相涉此或傳鈔者之失真偃不應謬戾至此也宋史藝文志別史有金陵六朝記一卷未載作者姓名故事類中朝故事作尉遲握崇文總目雜史又作尉遲樞又有南楚新聞三卷此又名之不同耳勞君平甫得明嘉靖辛丑嵒山人校閱樂意軒吳氏藏書本影鈔以贈余且云明末藏書家止有此本道藏神仙感遇記引六朝記與此異

### 六朝事迹編類

六朝事迹編類十四卷宋江東幹官張敦頤撰建康留守韓仲通所刊也書作於紹興三十年高宗戢影臨安是年殿中侍御史杜莘老請駐蹕建康以增士氣故此書於六朝建都一門極言建康爲根本地以吳孫皓梁元帝李嗣主爲失策此著書之微意不獨誇名勝遊覽而已也總敘一門言城鎮拒守最詳其餘諸門亦多駁



正舊說如檀城據建康實錄在墅城東八里非去縣八里方山據南齊書徐孝嗣諫武帝未嘗築苑温嶠墓據晉書當是嶠妻何氏墓之類周應合景定建康志實多取之亦有周略而此詳者如芳樂苑周列宮殿中作芳樂殿又如南唐興德王廟僅見此書宋人載金陵事書如陳軒金陵集石邁古迹編金陵故事乾道慶元二志等俱罕傳則此書亦幸存矣壬辰春於京師琉璃廠見曹棟亭家藏鈔本此書及石林建康集俱有棟亭曹氏長白敷槎氏昌齡印因購建康集假是書以臨寫之內元武湖作真武湖貞觀忠貞貞皆作正定爲宋本此書直齋書錄

解題作二卷與六朝宮苑記俱無撰人名氏茲本十四

卷與張氏自序及宋史藝文志合乃知世所行明吳琯

刊本併爲上下卷非其舊也吳刊本昇訛爲昇南唐先

音弁日光貌泉訛爲泉唐韋君碑寶泉書泉古暨字見

楊修之訛爲楊修景定志云楊備字修之慶厓中爲尚

尉往復江上賦金陵覽古百題詩他如脫落處文理多

不貫茲本較爲完好然亦不能全無誤字蓋傳鈔之過

今悉仍之審書中如烏衣巷張氏引晉書王導紀瞻皆

王榭航海改劉禹瓦棺寺棺當作官此書不引晉哀帝

錫詩王榭作王榭以陶官地施僧慧力造寺而

引長沙僧瓦棺馬鞍山隋陳爭馬鞍山在巫峽間誤引



讀書志 卷三  
考俱爲景定志所駁又昭明太子墓不言安甯陵而引窮神祕苑燕雀湖臺城獨詳沈約鬼子青箱吟詩菩提王靳尙兩載其廟城郭宮殿未爲賅備而靈異讖記神仙寺院廟宇分爲五門頗不免好奇之失繁簡失宜或沿襲圖經舊說未盡可據若古迹如新林板橋梅岡烈洲之類俱未載宋史仍有吳彥夔六朝事迹別集十四卷相輔而行當續訪之同學張君容園博學嗜古雅好金石以此書碑刻一門尤資考證爰重付梓余因與見攬撫數事附識於末以質當世道光庚子夏五月識  
埵識

建業 此書序云晉太康初廢建業復爲秣陵非也按晉書地理志云太康三年分秣陵北爲建鄴太平寰宇記晉太康三年分淮水北爲建業淮水南爲秣陵蓋二邑並置未嘗廢建業也又建業字因避愍帝諱改爲建康諸書皆同獨晉志失載而云改業爲鄴晉書凡建業皆作鄴後人多沿用之然當以業爲正江甯 序但云隋併秣陵同夏建康三縣入江甯縣未詳江甯名所自始諸書所載各異晉書地理志云太康二年分建鄴置宋書州郡志云太康元年分秣陵立臨江縣二年更名按江甯在淮水南宋書謂分



秣陵置是也太平寰宇記云故江甯縣城在縣南七  
十里輿地志晉永嘉中帝初過江南以江外無事甯  
靜因置江甯縣以江甯縣爲元帝所置與諸書不合  
然言江甯命名之義似可備一說景定志亦未引及  
故特錄之

江甯府 按唐至德二年置江甯郡此序未及考元  
和郡縣志云武德三年杜伏威歸化改江甯爲歸化  
縣九年改爲白下縣屬潤州貞觀九年又改白下爲  
江甯至德二年於縣置江甯郡乾元元年改爲昇州  
兼置浙西節度使上元二年廢昇州仍改江甯爲上

元縣此序吳南唐沿革據南唐書當補封徐溫爲齊  
國公事李昇本徐知誥僭位後始改姓名此直云封  
李昇爲齊王亦誤也吳瑄本更脫落不可通

漢川益州 論梁廢興云承聖三年魏陷漢川益州  
並誤也據周書梁書梁大寶二年十月魏達奚武取  
漢中侵南鄭承聖元年五月秦梁刺史蕭循降魏承  
聖二年尉遲迴伐蜀八月益州刺史蕭撝降魏承聖  
三年魏取襄徒岳陽王督於江陵又陳文帝大嘉二  
年破周將賀若敦武陵等六郡復南屬

靈和殿 南史云時舊宮芳林苑始成武帝以植於



太昌靈和殿前建康實錄亦作太昌靈和殿元王士  
點禁扁云二殿並在青溪

榮陽 吳孫皓置當作營陽宋書州郡志營陽江左  
分零陵立元和郡縣志吳分零陵置營陽郡以郡在  
營水之南因以爲名此作榮陽沿晉志之訛晉志謂  
穆帝立營陽亦誤此篇三國兩晉州郡沿革全用晉  
志詳畢尙書沅晉志補正

檀城 此本謝元別墅與東山墅自是兩地輿地志  
謂謝安弈棋所勝者是也按晉書建康實錄云安命  
駕出土山墅此安之墅也云留元圍棋賭別墅此元

之墅也若元勝則土山墅屬元今安勝故以元墅乞  
羊曇文義易曉後人不知元自有墅遂謂安以土山  
墅乞羊曇誤矣豈有勝棋而反輸物耶又重請者張  
元而賭棋者謝元明李維楨力辨安與張元賭棋謂  
非謝元不知張元焉得有墅亦何爲懼而不勝耶

烽火樓 自建康至江陵五千七百里按建康實錄  
紀陟答司馬昭曰自西陵至江都五千七百里此書  
云自建康至江陵非也

衛玠臺 景定志有衛玠墓而無衛玠臺此書亦未  
言築臺之故疑誤



賞心亭 景定志載此甚詳然有三書未引按曾敏  
行獨醒雜志云晉公自兩制出守金陵陞辭之日章  
聖以八幅袁安臥雪圖賜之旁題云臣黃居寀定列  
神品蓋不知爲誰筆也其所畫林石廬舍之所人物  
苦寒之態無不逼真侈上之賜於金陵城西北隅築  
堂曰賞心施此圖於巨屏觀者驚異張舜民彬行錄  
云丁晉公登賞心亭以家藏袁安卧雪圖張挂之於  
屏風晉公既去未幾遂亡其圖繼來者又以布衣鄧  
淑所畫寒蘆野鴨圖充之今蘆鴨亦無有但紙糊粉  
聖而已湘山野錄云賞心亭丁晉公出鎮日重建秦

淮絕致清在軒楹取所寶周昉袁安臥雪圖張於亭  
之屏凡經十四字雖極愛而不敢輒覬偶一帥竊去

以布按此下脫衣畫雁掩之君玉復守是郡登亭留

詩云云王琪詩已見此書中詩與江山相表裏爲質畫者之蕭

斧也阮閱詩話總龜引此條多脫誤諸書所言黃居寀宋鄧淑姓名足

補景定志之闕王漁洋尙書謂宋眞宗賜王欽若蓋  
因丁謂而訛耳

聽箏堂 江南通志辨訛類云舊志引六朝事迹云

晉元帝幸謝安宅命讌使桓伊笛又奉箏作金縢曲  
此孝武非元帝也伊自請箏歌乃在帝所非安宅今



觀此書云晉孝武幸謝安宅並無晉元帝之訛至云幸謝安宅則與諸書不合建康實錄云時上嗜酒司馬道子專政昏亂謝安女婿王國寶諂媚於道子安惡其爲人每抑制之國寶讒諛稍行於主相之間以妄功名盛極而構會之隙遂成帝時召伊飲宴安侍坐帝命伊吹笛卽爲一弄乃放笛云臣於箏分乃不及笛然自足以韻合歌管請以箏歌並請一吹笛人帝善其調達乃敕御妓奏笛伊又聞御府人於臣必自不合臣有一奴善相便串帝彌賞其放率乃許召之奴旣吹笛伊便撫箏而歌怨詩曰爲君旣不易爲

臣良獨難忠信事不顯乃見有疑患周旦佐文武金滕功不刊推心輔王政二叔反流言聲節慷慨俯仰可觀安泣下沾襟乃越席而就之將其鬚曰使君於此不凡帝甚有愧色晉書略同此書割裂致舛通志又從而甚之乃知讀史不易刪節也又聽箏堂非謝安墓此書云至今樵采者不敢近亦殊不可解

芳樂苑 景定志宮殿云齊芳樂殿引齊史云東昏侯大起芳樂玉華諸殿按南齊書云後宮遭火之後更起仙華神仙玉壽諸殿又於闕武堂起芳樂苑不載芳樂殿之名南史云於是大起諸殿芳樂芳德仙



華大興含德清曜安壽等殿又別爲潘妃起神仙永壽玉壽三殿又以閱武堂爲芳樂苑殿苑皆有芳樂之名獨景定志云玉華殿不知所出蓋卽玉壽之訛又景定志不載芳樂苑亦漏略也禁扁最詳

迎擔湖 擔負擔之義都濫切字從手景定志作檐非也按宋以前言石頭城後有此湖與元武湖宋時曾廢爲田並無莫愁湖之名至明人附會盧莫愁遂流爲丹青呂太守新修府志云見太平寰宇記考寰宇記無其名前人辨之獨勝棋樓羣信爲明太祖徐中山賭棋實有其事及讀王世貞金陵諸園記云東

園一曰太傅園明太祖賜中山王者餘魏公諸園皆徐氏子孫所創莫愁湖園者亦徐九別業也乃知中山王時並未有湖園豈有賭棋之事又讀京山李維楨遊莫愁湖記云前爲四美堂是徐髯仙篆後爲勝棋樓則徐公子筆也謝安賭棋在東山墅謂樓可以冒墅乎其論之如此徐公子卽徐九是王李二記俱不言明太祖徐中山賭棋事小說傳聞恐不如弇州京山之足據也然魏國諸園盡圯獨賴此一曲湖光瞻仰遺像子孫之宅祖宗依之當奉馨香於勿替也蘇峻湖 晉書成帝紀建康實錄俱云蘇峻爲李陽



所斬獨晉書蘇峻傳云峻突陣不得入將迴趨白木  
陂身門彭世李平等投之以矛墜馬斬之白木陂亦  
與白石陂異

桃葉渡 此沿圖經之誤景定志削而不載是也前  
人已辨之矣隋書五行志云陳時江南盛歌王獻之  
桃葉詞後隋晉王廣伐陳置將桃葉山下及韓擒虎  
渡江大將任蠻奴至新亭以導北軍之應然亦無桃  
葉渡之名又今上水門乃楊吳造城始貫淮水於城  
中若晉時自是城外獻之迎妾渡江及杜牧商女隔  
江之唱詩人偶爾寄興非可泥以地界也明時桃葉

渡遍種桃花 國初改設利涉橋卓發之詩池北偶  
談已言之矣

景陽井 張舜民彬行錄辱井石檻上刻後主事小  
字八分極其精古乃大曆七年張著文頗詳爲近年  
俗人題記刊刻所掩甚可惜也又有太和四年篆書  
可見者數字耳王象之輿地碑記曰云景陽井銘有  
二其一隋煬帝所作其一張著撰又陳景陽宮井欄  
石刻唐人書今在舊行宮歐陽公云晉王書戒哉戒  
哉字已不存象之觀書擒虎則闕去虎字書世則作  
比皆以避唐諱知爲唐刻也



鳳臺山 鶯鶯姚寬西溪叢話作鶯鶯宋元豐九域志載江甯縣有鳳臺山

馬鞍山 景定志駁之是已陳書呂忠肅南史脫忠字然與金陵無涉

望祭山 諸書皆有四望山而無望祭山然諸書亦無望祭之義此書亦不言山所在又無四望山惟引通典省四望座等事所未詳也

平陵山 韓晃斬於山下圖經云蘇逸亦斬於山下非也晉書成帝紀咸和四年己未將軍王允之及逸戰於溧陽獲之蘇峻傳蘇逸爲李陽所執斬於車騎

府又張健與馬雄韓晃等輕車俱走李閔率銳兵追之及於巖山健等不敢下山晃獨出帶兩步鞞箭卻據胡床彎弓射之殺傷甚眾箭盡斬之巖山卽平陵山寰宇記亦載

白楊路 吾侶偶游句有脫誤南史袁粲傳嘗步履白楊郊野道遇一士大夫便呼與酣飲明日此人謂被知顧到門求進粲曰昨飲酒無偶聊相邀耳竟不與相見語句小異卽此事也

烏衣巷 景定志辨王謝燕是已按山謙之丹陽記云吳時烏衣營處是烏衣之名始於吳而晉王謝特



居此巷耳近人謂王謝子弟皆服烏衣謬甚

秦淮石誌 輔公祐大宋乾德四年石誌楊文公談苑陳鵠耆舊續聞皆與此同玉海有乾德天明二號然考唐書武德六年八月輔公祐反國號宋七年三月斬之首尾僅二年耳且兩改元據此安得有乾德四年之誌乎疑元年之訛

郗氏化蛇 據南史郗氏沒於襄陽返葬徐州沒於梁武未卽位之前豈得云以生存如六宮耶鹿苑寺龍天王井蓋又因梁皇寶識而埒會也

燕雀湖 此書靈異門有燕雀湖墳陵門無昭明太子陵甚爲疏漏窮神秘苑所云不見正史武帝無移葬昭明事蓋埒會景帝殺臨江閔王燕數萬銜土置冢上王莽掘丁姬冢燕數千銜土投冢中而爲之也梁書南史皆云大通三年四月辛巳薨五月庚辰葬安甯陵建康實錄注陳書岳陽王卽位追尊昭明皇帝陵在建康縣北三十五里元和郡縣志陵在縣東北五十四里查研山建康志陵在城東北四十五里賈山前又南史杜顛兄弟發安甯陵以報漆髒之酷俱不載燕雀銜土成墳事按燕雀湖景定志引舊志云在城東二里走馬橋東或云今惟政鄉白蕩湖卽



其地是宋時已莫定所在要與查研山賈山絕不相涉明人因元武湖名後湖遂埒會爲前湖明孫應嶽金陵選勝篇云明太祖填塞前湖以爲大內顧遜園客座贅語又謂太平門外鍾山下小窪名燕尾湖俗且謂前湖大於後湖不知元武湖自王安石廢爲田惟有小池明初濬之以貯冊庫趙惟賢後湖志載之後人不知明初開後湖而侈談塞前湖爲大內誤矣昭明之陵旣發掘於杜崩復鏟平於明祖有是理乎清涼廣慧寺 温飛卿遊清涼寺詩此書及景定志俱載之按温詩非作於金陵也其詩云詩閣曉窗藏

雪嶺畫堂秋水接藍溪又有寄清涼寺僧詩云檐向玉峰籠夜雪砌因藍水長秋苔此與少陵藍水玉山之句皆作於長安藍田太平寰宇記云藍田山一名玉山三秦記有川方三十里其水北流出玉若金陵之清涼寺所謂雪嶺藍溪玉峰藍水何所指乎且石頭清涼寺楊吳順義中徐温建爲興教寺南唐改石頭清涼大道場五燈會元金陵清涼院文益禪師與李主論道清涼之名始於南唐温飛卿時安得先有詩乎温集一作清源寺攷宋敏求長安志藍田清源寺在輞谷唐王維表乞施爲寺卽温所詠也又唐張



祐石頭山寺詩不云清涼又今人不知清涼乃寺名  
石頭乃山名混稱之曰清涼山亦非也又考楊吳南  
唐以前唐亦有清涼寺在幕府山唐彥謙過清涼寺  
王導墓下云江左風流廊廟人荒墳拋與梵宮鄰多  
年羊虎猶眠石敗壁貂蟬祇貯塵萬古雲山同白骨  
一庭花木自青春永思陵下猶淒切廢屋寒風吹野  
薪又遊清涼寺云白雲紅樹路紆縈古殿長廊次第  
行南望水連桃葉渡北來山枕石頭城一塵不到心  
源淨萬有俱空眼界清竹院逢僧舊曾識旋披禪衲  
爲相迎按景定志宋明帝陵在幕府山西與王導墳

相近彥謙詩所云陵下卽指宋陵蓋寺可徙置而陵  
墓不可動移據此知唐時清涼寺在幕府山王導墓  
下至南唐有所遷改耳

後學朱紹頤謹校云句容尚  
仰止拓示景陽井闕作廣慧

瓦棺寺 棺當作官此書與方輿勝覽誤同景定志  
駁之是也按梁釋慧皎高僧傳竺法汰傳云瓦官寺  
本是河內山玩墓王公爲陶處晉興甯中沙門慧力  
啟乞爲寺止有堂塔而已及汰居之更拓房宇修立  
象業又起重門汝南世子司馬綜第去寺近遂侵掘  
寺側重門淪陷汰不介懷綜乃感悟躬往悔謝傳中  
所云山玩墓方志俱未載明人有阮籍墓之說程徵



君廷祚力辨其妄謂當是阮孝緒墓亦無他證後之  
修志者補河內山玩墓削阮籍墓豈不較有據哉

昇元寺 宋史五行志云周廣順初江南伏龜山圮  
得石函長二尺廣八寸中有鐵銘云惟天監十四年  
秋八月葬寶公於是銘有引曰寶公嘗作偈大字書  
於版帛冪之人欲讀之者必施數錢乃得讀訖卽冪  
之是時名士陸倕王筠姚察而下皆莫知其旨或問  
之云在五百年後至卒乃歸其銘同葬焉銘曰莫問  
江南事江南自有馮乘雞登寶極跨犬出金陵子建  
司南位安仁秉夜燈東鄰家道闕隨虎遇明興其字

皆小篆體勢完具徐鉉徐鍇韓熙載皆不能解及煜  
歸朝好事者云煜丁酉年襲位卽乘雞也開寶八年  
甲戌江南國滅是跨犬也當王師圍其城而曹彬營  
其南是子建司南位潘美營其北是安仁秉夜燈也  
其後太平興國三年淮海王錢俶舉國入覲卽家道  
闕意無錢也隨虎遇戊寅年也較此益加詳然言寶  
公葬伏龜山與陸倕製銘葬鍾山建塔不合且詩係  
唐五律體五行志雜取小說恐是埒會於寶公耳  
荆將軍廟 此圖經之謬按文選廣絕交論注引烈  
士傳但云荆將軍墓不云名軻軻爲燕太子客死於



秦安得有葬溧水之理

巴東獻武公墓 此書及景定志俱不詳名氏按南齊書蕭穎胄傳梁天監元年詔曰齊故侍中丞相尚書令穎胄可封巴東郡公邑三千戶本官如故喪還車駕臨哭渚次詔曰齊故侍中丞相尚書令穎胄葬送有期前代所加殊禮依晉王導齊豫章王故事可悉給諡曰獻武復齋碑錄云齊侍中蕭穎胄碑梁普通三年立卽此墓碑也嚴上舍觀江甯金石待訪目誤以齊故尚書令侍中巴東獻武公碑與齊侍中蕭穎胄碑析分爲二

謝濤墓碑 文見陶宗儀古刻叢鈔云濤字明遠祖瑤字球度父玘字景山又有宋臨澧侯劉襲墓誌泰始六年葬琅玕之乘武岡又有唐河東裴昌墓志元和十五年窆於上元縣鳳臺山梅嶺岡之東王鉅文永陽敬太妃墓誌銘 此書云在清風鄉按古刻叢鈔云太妃王氏祖粹父儼普通元年十一月己卯薨粵其月戊戌瘞於琅玕臨沂縣長千里黃鵠山據此則非清風鄉矣

韋君碑 今碑題朝議大夫檢校國子司業兼御史中丞吳郡開國男陸長源撰朝議大夫尚書兵部郎



中兼侍御史上柱國竇泉書貞元三年獻春之月上元之辰建造在茅山

夫人易氏墓誌額 按江甯金石待訪目引天下金石志南唐夫人易氏墓誌蓋稱蓋字是也碑有額而墓誌無額誌外合一石題銜名所謂蓋也陶宗儀古刻叢鈔有唐賈水部墓誌額是前人亦有稱蓋爲額者然皆誤矣

祭悟空禪師文 此書云李後主書非也陸游入蜀記云出西門遊清涼廣慧寺寺距城里餘舊有德慶堂在法堂前榜乃後主撮襟書石刻尙存而堂徙於

西偏矣又有祭悟空禪師文曰保大九年歲次辛亥九月皇帝以香茶乳藥之奠致祭於右街清涼寺悟空禪師按南唐元宗以癸卯歲嗣位改元保大當晉出帝之天福八年至辛亥實保大九年當周太祖之廣順元年則祭悟空者元宗也建康志以爲後主非是

舊經 當作舊圖經通志藝文略江甯府圖經六卷寰宇記引建康圖經太平御覽有金陵圖江甯圖江甯圖經惜今俱不存

金陵待徵錄



網羅舊聞儒者職也而往往出於畸人逸士明盛仲交  
負異才作棲霞祈澤牛首方山志周吉甫几格不虛巾  
箱常滿作瑣事初二三集剩錄二人皆諸生紆青紫者  
不逮焉雖然吉甫仲交志山寺錄瑣事耳考古必以正  
史爲宗不挾矜奇好異之見而濟以記醜言僞之才一  
事不貫首尾恐不能定是非一人不綜始末懼不能辨  
賢否或據名德之文集地志之近雅者小說雜家俚俗  
相傳均不汗其簡牘而古迹第宅亦不如牙人量界徒  
爲穿鑿乃著作之善者也唐李肇宋羅願其庶幾乎國  
史補自序云言報應敘鬼神徵夢卜近帷簿則去之記

事實探物理辨疑惑示勸戒采風俗助談笑則書之新  
安志自序云儒者之書具有微旨不同鈔取記簿金偉  
軍明經名途蹇滯有如盛周而掇拾金陵軼事爲待徵  
錄兢守李肇羅願之志七易稿成此書猶欲然以爲不  
足問序於余爰因明經之書引伸之以俟知言者道光  
庚子春三月序

游志續編

游志編有淳祐癸卯天台陳仁玉自序其目錄有僅存  
地名如泰山沂水有僅存人名如陸賈疏廣不知其例  
惟周夔到難陳寬穎亭記謝希澤遊嵩山他處不多見



惜有目無書游志續編南村居士陶宗儀九成所集首  
絳守居園池記若范至能駮鸞錄吳船錄則世有其書  
列其目而文未寫所錄七十六篇如康譽之西京隱居  
記尤袤遊洞靈詩序韓流隱趣麻革遊龍山皆宋以來  
佚作戴帥初宛溪南游詩序劉會孟平福堂記亦剡源  
集須溪記鈔所無此編隨手輯錄不次時代南村同時  
宋景濂孫滄螺貝清江咸錄其文蓋一時興到之所編  
也

紀古滇說集

此書題咸淳元年滇民張道宗錄乃有段思平更國號

大理元世祖立段信苴實留守大理此二條明人所續  
也其書簡略殊甚蒙舍名多與史異考樊綽蠻書載蒙  
舍詔稱南詔舍龍生龍獨羅亦名細奴邏此書云哀牢  
王孫曰奇嘉以建國社稷故名蒙社按蒙舍乃詔之本  
名非因社稷始以社爲號也又以羅盛炎爲樂誠盛邏  
皮爲誠樂皮邏閣爲魁樂覺閣羅鳳爲覺羅鳳異牟尋  
爲意慕新尋夢湊爲新覺勸之類蓋蠻書據其通中國  
名此書以華言飾之也八詔六賧諸蠻名類兼併始末  
均未詳考滇南古書散失沐朝弼如見樊綽蠻書必不  
舍彼而刊此也升庵跋語以爲野史之流郡乘之稗云



爾升庵作滇載記於元代段氏總管最詳於此書亦有採掇出自宋元間之傳聞所云金馬碧雞云阿育王三子福邦宏德至德亦不似西域國人名

安南志略

安南志略二十卷元安南侍郎紙縣令尹遷佐靜海軍節度使陳鍵幕黎崩景高撰至元癸卯元兵伐安南崩隨鍵降元封國弟陳益稷爲王送還國安南世子迎拒潰走匿海島元以暑溼班師崩從益稷居漢陽遙授同知安暹州事世子遣子翌入貢方物元因撫諭之加益稷湖廣等處行中書省平章政事留鄂卒葬漢陽賀家

山崩述其國事跡爲此書卷一郡邑山水古跡風俗邊境服役卷二元詔制前朝書命卷三元奉使前朝奉使卷四征討運餉前朝征討卷五元名臣往復書問前朝書疏卷六表章前代書表卷七八九漢以來太守唐都護宋刺史卷十歷代羈臣卷十一趙氏世家五代時僭竊丁氏黎氏世家卷十二李氏世家卷十三陳氏世家內附侯王卷十四學校官制章服刑政兵制歷代遣使卷十五人物名人方外叛逆物產卷十六雜記歷朝名賢雜題卷十七至元以來名賢奉使安南詩卷十八玉堂諸公贈送天使詩序卷十九安南名人詩卷二十圖



志歌敘事終焉

南雍志

南雍志二十四卷明高帝定鼎金陵洪武元年改京學爲國子學轉博士晉祭酒十五年改建於雞鳴山之陽三月初七日改國子學爲國子監中爲彝倫堂分兩廳六堂三十二班以舊國子學爲應天府儒學成祖永樂元年二月庚戌初設北京國子監志名南雍者別於北京之稱也景泰中祭酒吳節始創爲志首之以紀事次職官表次爲考者六規制謨訓禮儀音樂儲養經籍次之以列傳終焉規制音樂仍畫爲圖凡十八卷嘉靖中

祭酒黃佐重纂爲二十四卷體例一仍其舊太學東堂爲齋宿所西堂爲考課所祭酒廂房在東其連廟北向者爲司業南廂房西廂房爲監丞繩愆廳亦呼博士廳六堂在正堂之後率性修道誠心正義崇志廣業助教學正學錄分居之典簿廳在彝倫堂東近倉三間以居典籍其左爲掌饌廳前爲儀門有進士題名碑四左有小門下有進士題名碑前有東西井泉二東西書庫各七間各爲樓街南有國子監牌坊東西成賢街牌坊二座南成賢街牌坊一座與珍珠橋相連敬一亭在廣業堂後嘉靖七年少師楊一清奏立有御製敬一碑御注



視聽言動心五箴光哲堂在敬一亭後爲琉球國官生受業所居講院在英靈坊東祭酒湛若水以故射圃隙地爲之正堂曰觀光堂屏刻心性圖說中允呂懷於堂東立心統圖碑堂西立律呂古義圖祭酒程文德於前建聚樂亭又前爲蓮池射圃司業王材題其門曰觀德門堂曰正直堂又土橋名浴沂橋如此之類非披尋是志不能知也憶道光二十年余與陳君宗彝吳君啟期遊普德寺遇樵夫指其旁曰國子監地諸君不能解今觀此志有聚寶門外園地圖乃洪武間撥賜國子監園四十二畝四季辦納瓜菜乃知野老之言有據也經籍

考天順年間官書有二十一史分藏彝倫堂與六堂七處一百四十七部三千七百八十本以便師生觀覽其十七史皆元建康道肅政廉訪使所得善本正德十年刊補嘉靖七年校正補刊乃完其梓刻本末助教梅鶯盤板分經子史文集類書韻書雜書石刻九類十三經注疏多皆宋元刻六經正誤係元大德三年刊補金仁山論語集注考證二十卷多於今本止十卷元緱山杜氏論語旁通今無傳唐書二百十五卷釋音二十五卷另編宋景定臨川志三十五卷宋靜江教授江文叔乾道桂林志二十七卷宋瑞陽志二十一卷又有新泉志



俱佚其餘明人書多足備考證亦目錄家之所必考也  
石刻有詹同大字千字文杜環千字文亦金陵書家之  
遺蹟黃佐又有南雍條約一卷又瞿銑南京國子監條  
例類編六本草稿二十二本南雍申教錄十五卷留都  
錄五卷皆與此志可互證俟訪之生徒之數洪武十五  
年官民生許恆等五百七十七名二十六年悅慈等八  
千一百二十四名永樂二十年冠帶舉人官民生方瑛  
等九千九百七十二名為極盛至宣德時漸少正統以  
後只二千餘名自此以後多者尚有六千五千餘名正  
德以後只有一千餘名至少至八百七十名雖北京分

設太學然文教亦衰矣第十五卷有黃觀傳云黃觀字  
瀾伯貴池人累遷尚寶司卿禮  
部右侍郎進本部侍中壬午五月往上游諸郡徵兵至  
安慶聞內難已平慟哭謂人曰吾妻素有志節必不肯  
受辱明日家僮自京逃來言將執家屬夫人雍氏出通  
濟門先擠二女於河即自沈焉觀遂招魂葬之江上舟  
次李陽河乃朝服東向再拜於羅刹磯湍急處給舟人  
奮棹佯為渡解投水而死時年三十九今諸書雍氏皆  
訛為翁氏

中興禮書續中興禮書

宋中興禮書三百卷凡吉禮嘉禮賓禮軍禮凶禮五類  
分子目六十八門有王信序云淳熙七年權禮部郎官  
范仲藝奏請編次八年行太常主簿陳賈奏乞刪修建  
炎以來以至淳熙典禮續中興禮書八十卷葉宗魯序



云嘉泰二年權禮部尚書費士寅禮部侍郎木待問行  
 太常主簿葉宗魯劄子檢準孝宗一朝典禮續修其書  
 世罕傳徐星伯太守松從永樂大典採出付龍元任觀  
 察以活字印行龍旋卒未果此書為嘉興錢味根聚明  
 府所得味根官四川彭山令引疾歸里余宰嘉禾延味  
 根掌教鴛湖書院商校元徐碩至元嘉禾志因出此以  
 相贈余不敢受曰此書朱氏得之則錢氏失之非流傳  
 之廣也假鈔可乎卷冊繁重爰付鈔胥六人八閱月始  
 成以原書歸錢氏正編則吉嘉賓軍有關卷凶無闕續  
 編則吉嘉軍有缺卷賓全闕凶無闕余獲此書每出示

同好武林勞季言

權

吳門顧湘舟

沅

皆從余借錄癸丑

春至京師虎坊橋晤葉潤臣

名禮

中翰云藏有精鈔本亦

從星伯傳錄惜匆匆不及借校余所見味根本乃星伯

初輯稿也錢警石

泰

甘泉鄉人稿云星伯官翰林時所

採味根云乃揚州修全唐文時曾頒永樂大典星伯因

禮書非全唐文所宜取慮鈔手或致延歲月故每卷末

標題全唐文字樣以速之耳

壇廟祀典

壇廟祀典三卷直隸總督桐城方觀承撰有乾隆二十  
 三年戊寅序上卷首載雍正元年迄乾隆十年 上諭



十一道次通例次社稷壇風雲雷雨壇先農壇常雩中  
卷文廟關廟下卷羣祀自城隍龍王至明保定知府章  
時鸞祠于清端公成龍祠終以附論凡載祀典者皆直  
隸畿輔守土之義有司之存寺觀仙釋不與焉采輯古  
義分行細書列考證於前至 本朝會典以大書列後  
豆籩左右俎坩高下有圖有說雍正元年禮部定議各  
府州縣每歲祭祀壇廟一應供獻祭品樂器會同太常  
寺繪圖著爲成式釐爲定數彙纂成書頒行天下觀承  
所繪之圖本於禮部舊式其續增以後事及考證古義  
則新加也覽此書者由直隸推之各省府州縣於秩祀

大典可率由罔越矣丁巳浙有飛蝗江友竹太守向余  
詢劉猛將軍事實因閱是書引周禮族師祭酺注以爲  
酺人物災害之神疏謂漢時有蝻螟之酺神蓋亦爲壇  
位如雩祭云文獻通考宋建隆二年曹濮等州蝗命長  
史以牢禮祭之天禧元年蝻蟲生諸州軍於公宇設祭  
慶曆四年臣僚言天下螟蝗頗爲民物之害乞京師內  
外並修酺祭是主蟲災者酺神也畿輔通志劉猛將軍  
神名承忠吳川人元末授指揮壯歲詰戎奸盜斂戢適  
江淮飛蝗千里揮劍逐之蝗盡殛死後以王事自沈於  
河土人祠之有猛將之號雍正二年總督李維鈞以靈



蹟顯著奏請所在官司秩祀以春秋戊日得 旨允行方觀承案劉猛將軍不見正史通志所據乃靈異錄蓋出自道藏或曰神諱宰字平國金壇人宋紹興中進士仕至浙江東倉司幹官告歸隱居三十年卒諡文清以正直爲神能驅蝗保穡俗稱將軍者誤也翟灝通俗編引汪沆識小錄相傳劉銳卽宋將劉錡弟歿而爲神驅蝗江淮間有功 本朝雍正十三年詔有司歲冬至後第三戊日及正月十三日致祭宋史劉錡傳不載有弟銳伏讀雍正三年七月 上諭舊歲直隸總督奏稱畿輔地方每有蝗蝻之害土人虔禱於劉猛將軍之廟則

蝗不爲災據此汪沆十三年祀劉銳之說不及畿輔通志之確陶文毅公澍重修劉猛將軍廟碑記云神名承忠見於降靈錄怡庵雜錄謂宋江淮制置使劉錡驅蝗宋封爲揚威侯天曹猛將軍之神按宋劉錡字信叔成紀人官至威武軍節度使鎮江都統制京東河南招討使太尉贈開府儀同三司諡武穆並無驅蝗事方敏恪公以爲宋劉宰考漫塘文集嘉定己巳金壇粥局記云嘉定秋天子以畿內旱蝗出使尙書郎留公移縣發義倉又記通判行述云諱極知樂平縣俄有蝗自西北來所至害稼過縣不下人以爲德政所感宋史列傳載旱帥守命



讀書記 卷三  
賑荒邑境多所全活端平敕命云勅朝奉郎寶謨閣主  
管建昌軍遂訛爲將軍歟

千頃堂書目

千頃堂書目三十二卷上元黃虞稷俞邵徵君所輯俞  
邵父居中字明立世稱海鶴先生閩籍萬厯乙酉舉人  
官上海教諭遷南國子監丞轉黃平知州不赴築千頃  
堂藏書數萬卷年八十三間北京陷北向一慟而卒今  
西華門外馬路街是其遺居也虞稷爲海鶴之次子能  
讀父書薦修明史一統志此書自序略云明初修元史  
者藝文不爲特志明文淵閣書目僅及元季三百年作

者闕焉故更其例記一朝之著述元史旣無藝文宋志  
咸消以後多闕今並取二季以補其後而附以遼金之  
僅存者萃爲一編列之四部此其體例也修明史者取  
此書明人著作爲藝文志倪閻公錢辛楣補元史藝文  
志遞相增益杭大宗云千頃堂載宋人著作皆宋史所  
遺非複出也余見此書凡數部若地志及制義獨此本  
爲完備余好搜尋桑梓文獻此書載金陵人著作亦最  
詳然此書所載余獲見者不及十之四五余所見而此  
書未載者亦十之二三甚哉載籍之浩博難窮也

拜經樓藏書題跋記



拜經樓藏書題跋記五卷海昌吳騫題跋所藏書有題跋語其子壽暘手錄成帙附古官印考古今體詩則壽暘作也騫字槎客一字葵里晚號兔牀山人居新倉里小桐溪築拜經樓藏書五萬卷多善本校勘精審晨夕坐樓中展誦摩娑非同志不得登吳門黃蕘圃不烈多藏宋版書顏所居曰百宋一廬槎客以千元十架揭榜與之敵得宋本咸淳臨安志九十一卷又得乾道志三卷淳祐志六卷刻一印曰臨安志百卷人家有愚谷叢書其中謝宣城集羅隱讒書宋湯漢陶詩注爲最佳其自著三十五種目錄詳海昌備志其小桐溪隨筆尖陽

叢筆尺苑考訂經史辨別名義與陳萊孝譙園周春松靄周廣業耕厓朱兆熊茲泉陳鱣仲魚錢馥廣伯俱耽道學古爲海昌耆宿壽暘字虞臣槎客以宋槩東坡先生集授之因自號蘇閣有蘇集補闕一編虞臣子之淳字鱸鄉能守遺籍校讀不倦海昌藏書家若許氏敦敘樓胡氏華鄂堂馬氏道古山樓許氏學稼軒俱散佚仲魚果園藏書亦無存仲魚經籍跋文九十九篇與槎客題跋硤石蔣生沐同刊於別下齋叢書

隋書經籍志考證

余於孫淵如觀察文集中知會稽章孝廉宗源編輯勤



苦思求其書既卒孝豐章廣文炳奎其族裔也廣文云孝廉著述甚富歿後多零落有隋書經籍志考證最詳核余好爲目錄之學常以王伯厚漢書藝文志考證極博且精惟增入二十六種屢雜贗鼎至漢人著作仍有出於伯厚所載之外者若隋書經籍志則余素所措意者也屢欲爲之考證恨見書少又不能專心從事聞孝廉有是作爲之躍然廣文許索諸其家不可得余攝牧海昌錢警石學博云全書未見若史部考證則有之隋志所載今佚者必詳載體例及諸家評論如干寶晉紀則列劉彥和文心雕龍劉子元史通之議又如司徒儀

則列北堂書鈔設官部從事中郎之職太平御覽職官部右長史之職以備其說至史部爲太平御覽目錄所引隋以前書凡經籍志未載者悉取以補之御覽雖修於宋初然以修文殿御覽爲藍本故可據也此外如初學記北堂書鈔藝文類聚通典通考玉海白帖之類皆旁摭其佚文隋以前乙部殆無遺珠矣余假鈔副本至經子集考證未知有收藏者否

元牘記

元牘記者明上元盛時秦仲交碑帖跋語也仲交家有蒼潤軒楊升庵爲之記明時金陵收藏家顧璘東橋徐



霖髯仙黃琳蘊真羅鳳印岡謝少南與槐並著於時後多散佚惟印岡太守傳至其元孫燾字原溥與姚澍元白巖賓子寅俱精鑒賞仲交所跋多羅姚二家物於金陵碑碣頗詳如元楊翮文舉八分書古追東漢余惟見其岷縣學宮記行書此有瞻儀堂記八分書宋劉次莊仁壽縣君墓誌僧欲碎爲路顧東橋見而止之王荆公此君軒詩嚴子寅欲構亭種竹東西壁以是石嵌之及王南原詩四卷徐子仁三體千字文顧司寇詩稿足資遺聞仲交更有蒼潤軒題跋與此略相同仍有祈澤牛首樓霞方山志雞籠菊品余俱有其書其大城山人集

及其子敏耕伯牛軒居集未見全帙僅於選家見其詩而已維時姚汝循鳳麓司馬泰西虹黃甲首卿李登如真朱之蕃元价黃居中明立俱以收藏名焦竑弱侯有金陵名賢帖顧起元鄰初有江甯古金石考尤爲表著近世鄭簠谷口嚴長明東有樊明徵聖模亦多藏碑帖東有之子觀字子進有江甯金石記待訪目然牛迹山茅君別院碑未載其文仁壽縣君墓誌不知趙嶠乃清獻公弟揚之子齊巴東獻武公侍中蕭穎冑碑判爲二人余所見宋少保威定王德碑亦未見采暇嘗與陳宗彝雪峰汪士鐸梅村張寶德容園吳繼曾癡仙議撰金



陵金石志篆隸各體鉤摹必肖始漢校官碑迄明初孝陵及陪葬功臣墓碑明初碑亦五百年故物也至待訪各碑分爲二例取建康志金陵新志古刻叢鈔諸家文集其碑未見而文存者錄其文六朝事迹輿地碑目寶刻叢編類編各家目錄其碑與文俱未見者錄其目以俟後之人有所考云

開有益齋讀書志卷三

終

開有益齋讀書志卷四

子部

法家

疑獄集

重刊宋本棠陰比事

三首

醫家

養生必用方

南陽活人書

素庵醫要

醫經正本書

精選百一方



天算

七政推步

雜家

緯略

批言

臺閣名言

類書

分門古今類事

六帖補

小說

至正直記二首

櫟翁稗說

道家

梅仙觀記



開有益齋讀書志卷四

疑獄集

上元朱緒曾述之

余所見疑獄集凡三本有前二卷和凝編後一卷子矇  
續分上中下爲三卷有矇及杜震序吳太初長元跋云  
顯仁矇之字中允繼父志彙成百條勒四軸今存六十六  
條蓋佚去四分之一此竹垞曝書亭傳鈔本也有前集  
二卷四十七條和凝編後集二卷三十三條和矇編續  
集六卷明張景編附許襄敏異政此天一閣范氏錄入  
四庫本也有前集一卷四十七條和凝編後集一卷



三十二條和矇續無韓億乳醫條續集上下二卷明張景編附許襄敏異政此錢塘陳鴻壽重刻遲鳳翔本也二本俱不及百條晁氏郡齋讀書志刑法類疑獄三卷右晉和凝撰纂史傳決疑獄事其上卷凝書中下卷凝子矇所續是分上中下爲古本然竹垞所藏凝多矇寡亦與晁志不同晁志三卷亦與矇序四軸不合鄭克折獄龜鑑云和凝疑獄原二十九條以時代爲次張舉事在吳人之末晉人之前明刻本以唐御史佯失狀爲首張舉事在苻融之後張允濟聽蔥揚牧咎巫崔黯搜拏三事鄭克皆引舊文明和氏本俱無之咎巫搜拏在張景所續聽蔥竟不載金世宗大定元年卽宋高宗紹興三十二年金章宗明昌元年爲宋光宗紹熙元年和矇乃五代末宋初時人忽云大定唐公爲冠氏令明昌間景州一婦畜二姦夫則年代相去甚遠知和氏父子之書爲後人刪削及竄入者多也遲鳳翔所附許襄敏異政十一條今本王錫祿事闕末八行甄廷詔事闕首二行定陶段禮事六行全闕取明陳文燭所刊折獄龜鑑可補其文蓋疑獄集古本不可得矣

重刊宋本棠陰比事

比事屬辭春秋之教漢人以經決獄董江都箸決事比



讀書志 卷四  
崇文總目載之宋四明桂夢協棠陰比事蓋取此義其書采和魯公父子疑獄集鄭氏克折獄龜鑑聯成七十二韻一百四十四條使事必相比易於觸類引伸斯桂氏之義例所以有異於和鄭之書也桂氏於開禧丁卯始以餘干尉聞糾曹孫起予之論留心議獄嘉定辛未官建康司理右掾撰成此書端平改元以尙右郎官陞對理宗褒嘉謂嘗見所編棠陰比事知聽訟決能審克除直寶章閣知常德府此書用是重刊流布宋史漏略竟失其名然知爲循吏無疑矣明景泰閒吳文恪公訥病其聲韻對偶以爲敘次無義刪去其相類複出者僅

存八十條別以刑獄輕重爲先後首五條引大明律末二條增入已論補遺二十四事附錄四事用心亦勤自吳氏本出而桂氏之原書遂晦余初得吳氏本以爲桂氏以比事爲義若以事之相類者爲複出而刪去之甚失比事之義於是購求原書今年己酉夏得吳門黃蕘圃所藏宋本有嘉平辛未張處識語知桂字夢協首有趙宦光崑山徐氏兩印復讀蕘翁跋語知爲難得之冊不敢自祕重爲鋟木以傳夫古今詐僞之人百出不窮鉤距止一智觸悟止一誠比類以期其合推類以盡其餘神而明之存乎其人執是編以求咎繇之明允蘇公



之式敬甫侯之簡字鮮有不三隅反者余慚教養之方  
訊質無所呵喝盜賊不輕拷掠每決一獄不憚者累日  
懼不學之無術時取吳氏鄭氏之書以資觸發茲編刻  
成猶足益人神智閒嘗論之和氏之疑獄倚撫故實乃  
法家之成案鄭氏之龜鑑辨論精審乃成案之讞語桂  
氏之比事依類聯貫乃成案讞語之比例三書不可闕  
一皆仁人君子之用心也桂氏萬榮生子宣議郎某歷  
傳知富陽縣康老贈運使俊卿參政與紹晉府長史德  
稱字彥良中書舍人慎又有裔孫怡登進士第自宋至  
元明爲世族文恪據王學士景彰集考之綦詳附識於

此以見積善之慶至文恪增益非無可取因非原書所  
有不敢屢入茲編所遺及金元折獄有可取者擬爲續  
比事采掇未竟若夫成書請俟他日道光二十九年歲  
在己酉冬十月序於嘉興縣署

余前序於桂夢協事實未及詳考近見寶慶四明志云  
慶元二年鄒應龍榜進士桂萬榮楊慈湖遺書有遺桂  
夢協云夢協謂心之精神是謂聖此聖人之言何敢不  
信但學者所造有淺深某謂道無淺深先聖曰改而止  
謂改過卽止無庸他求精神虛明安有過失意動過生  
要在不動意爾余按慈湖心學以頓悟爲宗未免過高



之弊夢協所云學者所造有淺深其說正未可廢惜其  
往復語不盡見也桂氏爲慈谿著姓慈谿縣志循吏傳  
桂萬榮字夢協慶元二年進士授餘干尉邑多豪右一  
以紀律繩之馭民慈愛子弟獲訓迪者恥爲不善秩滿  
民爲乞留調建康司理參軍鄉相史彌遠欲招致之萬  
榮以分定固辭差主管戶部架閣除太學正輪對奏絕  
敵選將二事除武學博士兼宗學方嚮用力求補外通  
判平江府時守朱在政尙嚴刑以鹽課拘繫甚眾萬榮  
具書告在不從挾行牀與所拘人同寢在愧卽委縱遣  
焉陞守南康檢吏姦省浮費征稅有法民幸其利累官

直祕閣遷尙書右郎除直寶章閣奉祠以歸萬榮嘗問  
道於楊簡簡曰心之精神是謂聖此聖人之言也遂究  
道而築室東山之麓曰石坡書院讀書其中著論語精  
義若干卷又取古人資於折獄者類成棠陰比事俱燬  
按縣志所載詳矣然直寶章閣失載知常德府一官夢  
協與慈湖辨學有淺深道無淺深但云心之精神是謂  
聖遂究道亦未明晰棠陰比事未嘗與論語精義俱燬  
此皆縣志之疏余嘗疑夢協識語有云鋟梓星江遠莫  
之致今始知爲守南康時所刻也桂氏後裔之盛寶慶  
四明志桂氏進士有紹定五年桂去疾桂錫孫原注必  
之孫萬



榮之姪淳熙十年桂本開慶元年桂壯孫童子科桂資孫  
慈谿縣志以本爲淳祐元年進士錫孫試童子科無資  
孫名皆誤又有宋進士巖元鄉貢彥良明進士曰芝曰  
怡曰琛曰延理曰詔曰一章其科名繼起不獨王景彰  
所言而已元音有元字師善璵字懷英以詩名縣志有  
夢協四世孫同德教授郡庠以教化爲本宗儒宗藩俱  
彥良從子預修永樂大典可稱世濟其德矣曹秋岳學  
海類編有棠陰比事亦吳文恪刪本也

余旣刻宋本棠陰比事成客問曰書中江分表裏云江  
某郎中註云衢州開化人今失其名見李泰伯所撰志

君能知其名乎余應之曰李江集云公諱鎬字某折  
獄龜鑑止稱江某郎中然余嘗考之知鎬字從周胡致  
堂斐然集左朝散郎江君墓誌銘云江袞衢州開化人  
曾祖鎬尙書屯田郎中李泰伯爲志墓焉陳倫宏治開  
化縣志江鎬大中祥符五年進士字從周守三州以惠  
愛稱子楫孫汝言曾孫袞所載與斐然集同陳倫序云  
得宋代鈔本志可證也客又問撰折獄龜鑑之鄭克余  
應之曰元劉壎隱居通議云高宗紹興三年降詔恤刑  
戒飭中外俾務哀矜時有承直郎鄭克明爲湖南提刑  
司幹官因閱和凝疑獄集易舊名曰折獄龜鑑劉起潛



稱爲鄭克明知克字克明呂成公方元恪墓誌女孫婿  
迪功郎建康府上元縣尉鄭克是曾由縣尉而爲幹官  
其本貫開封人南渡因徙家焉客喜而退爰綴於簡末  
養生必用方

重改正古今錄驗養生必用方上中下三卷宋靈泉山  
初虞世撰次有紹聖五年四月日宗室捐之序云初虞  
世在元豐中嘗鏤版累經摹搨爲人妄有損壞今復刊  
正別立序論直齋書錄解題亦云三卷靈泉山初虞世  
和甫撰紹聖丁丑序卽此本也晁氏郡齋讀書志養生  
必用方十有六卷初虞世撰序謂古人醫經行世者多

矣所以別著古方分劑爲今銖兩不侔用者頗難此方  
其證易詳其法易用苟尋文爲治雖不習之人亦可無  
求於醫也虞世本朝士一旦削髮爲僧在襄陽與十父  
遊從甚密今無此序是晁氏另一增多之本文獻通考  
十六卷乃晁本也此書名古今錄驗惟僧智深治唐丞  
相李恭公患眼翳唐侍御王元鑒進金露圓終南道士  
治胡陽公主難產爲古時人之方案康郡君苦風秘文  
潞公苦大腹不調李公儀病肺之類皆虞世親驗治之  
方王淵傷寒編逸方獨孤及治盛文肅太尉肺熱張公  
度治黃魯直母秘結杜方叔楊公遠治楊侍講郡君痰



道人治汶富人子張生日疾爲同時驗治之證至程正  
叔先生以目翳方授汶人孫彥先待制自效爲王淵借  
職作名醫傳程正叔先生見驗者十餘人程正叔知醫  
可與蘇沈良方並稱也王狀元任先生文大夫服碧霞  
丹致死一條力辨妄人託夏噩姓名作王魁傳之誣幾  
七百餘言詳王俊民力學愛身可謂不負死友俊民贈  
詩寒窗一夜雪紛紛來朔風之子動歸興輕袂飄如蓬  
問子何所之家在濟水東問子何所學上庠教化宮行  
將攜老母寓居學其中亦詩話所不載張處厚潞人父  
有德不仕與嵩山邢昂先生爲莫逆交邢有道之士石

曼卿輩皆尊禮之自有碑刻處厚子騃有賢行李公名  
丁齊人才器業文章與世懸絕不可企及石曼卿劉潛  
輩皆拜之又心服曼卿集中老仙遺孫生齊魯性鍾清  
明氣高古儀形如表聲如鐘胸有奇才備文武卽李亦  
爲輯曼卿集者所未見則其敘名德資談助不獨醫家  
圭臬也此書宋刻每半葉十二行每行二十二字

南陽活人書

增註類證活人書前集十卷後集五卷活人外書三卷  
政和元年奉議郎致仕朱肱撰首有進表云遣男遺直  
賚臣所撰書一函八策共二十卷張藏序云華陀指張



長沙傷寒論爲活人書長沙南陽人也肱祖述其說余因揭其名爲南陽活人書云大觀五年正月序儒醫免解進士祝三省擇善書重校證後集析爲百問有建甯通守錢聞禮目次湯尹才序外書十三篇一百四十五方信陽軍管幹王實編示張藏序云得百問於三茅山後與肱遇於杭盡得其書序之凡二十卷九萬一千三百六十八字今合前後外集凡十九卷蓋以經絡脈穴二圖爲首卷也程沙隨引肱自書後云獻書後八年刊於杭州大隱坊乙未明年過方城見同年范內翰合合證與方爲一至睢陽見王先生言成都湖南福建兩浙

皆刊其書建州饒州民間各刊舊本池州公庫刊校正本此本分前後外集亦無肱書後乃未合證與方爲一之本文獻通考作二十卷直齋書錄解題作十八卷愛日精廬著錄亦十八卷沙隨辯其以湯爲煮散又謂姑孰李穰傷寒治法撮要發明活人書所取者舊本未嘗見校正本愈以知肱書卷數多寡不一也直齋題朝奉郎直祕閣吳興朱肱翼中撰此本題奉議郎致仕乃其獻書時官階直齋謂肱爲祕丞臨之子中書舍人服之弟亦登進士科按齊東野語肱烏程人登第著名節有南陽活人書兄服登進士中書舍人兄子或有萍洲可



談肱自號無求子云治傷寒先須論經絡不識經絡觸途冥行又謂診脈須兼診手足尤今醫所未講也此本乃宋刻之極精者葉有天啟甲子八十翁孫雲翼錄周密語於進表謝啟後樓鑰攻媿集增釋南陽活人書序云無求子朱公肱士大夫中通儒也著南陽活人書吾鄉王君作肅自號誠庵野人又博取前輩諸書凡數十家參入各條之下名曰增釋南陽活人書

素庵醫要

素庵醫要十五卷宋陳沂字素庵所傳醫案明嘉靖時裔孫諫字直之始輯而行之素庵精婦科嘗療高宗妃吳氏危疾得賜宮扇其子孫名靜復名清隱者皆不忘

君惠刻木為扇以為榮卷首繪素庵執扇像贊曰陳氏素庵蓋世所稀康后扶疴為帝所奇出入禁中惠扇宮儀敕授翰院金紫良醫事載萬厯杭州府志今其後人居嘉興角里街門前列一木扇上書宋賜宮扇南渡世醫八字仍世為婦科蓋自宋至今五百餘年可謂世醫矣余親見木扇訪之問於于辛伯秀才源辛伯為余言宋高宗時事既獲見醫要乃知辛伯之言有據辛伯著柳隱叢話詳載之然醫要備列方藥不專婦科也是書醫家罕見余所獲乃嘉靖時初印本

醫經正本書



醫經正本書一卷題文林郎知隆興府進賢縣主管勸  
農營田公事沙隨程迥撰有<sub>淳熙丙申</sub>自序凡十四篇  
曰有唐醫政本朝醫政傷寒温病熱病並無傳染之理  
辯五運六氣感傷名曰時氣亦無傳染辯四時不正氣  
謂之天行卽非傳染論醫書辯本草千金方權量度辯  
弦脈屬陰辯傷寒兩感不治辯活人書以湯爲煮散辯  
發汗宜對證不論早晚辯方士著書乃采俚俗不合醫  
經記仲景事實與內弟襄陵許進之論醫書以知洪州  
龍學范致虛謙叔榜文附焉直齋書錄解題云專論傷  
寒無傳染以救骨肉相棄絕之弊是也引麟臺故事嘉

祐二年置校正醫書局於編修院一條爲今輯本麟臺  
故事所不載引漢書律<sub>厯志</sub>杜佑通典皆以百黍爲一  
銖駁林億等以十黍爲一銖之誤辯南史徐文伯使范  
雲以火燒地布桃葉汗解可治表證不可治胸膈裏證  
若表證可汗豈至促壽爲史差舛辯張文潛龐安常墓  
誌安常以桂枝湯治林英女病傷寒死已一日而蘇謂  
桂枝乃發表藥表證無昏之類乃知不通仲景之醫理  
雖盡讀江瓘名醫類案取史書說部之奇異以試今人  
之病鮮不爲所誤也沙隨爲宋名儒循吏是書端風化  
廣仁術豈止醫家之主臬哉仁和勞季言<sub>權</sub>得江都江



鄭堂影宋本余從而傳錄因寄金山錢賓之培刻入萬卷樓叢書中沙隨之婿鄱陽董焯有救荒活民書余亦有宋刊本

精選百一方

精選百一方八卷宋王璆撰首有皇統四年汴京國子監博士楊用道序云行省得乾統間所刊百一方善本卽王氏所謂皆單行徑易約而已驗籬陌之間顧盼皆藥家有此方可不用醫其書經王氏增修而益完復摘唐慎微證類本草所附方分以類例附於百一隨證之下目之曰百一方更加讎次按直齋書錄解題醫家類

是齋百一選方三十卷山陰王璆孟玉撰百一者言其選之精也此本因王氏之舊復加以唐慎微所附方書僅八卷乃楊用道增修併合之本故卷數多寡不侔孟玉原書不可見此爲元人刻本亦醫家所不廢也楊用道又云大編廣集奇藥羣品自名醫貴胄或不能以兼通而卒具況可以施於民庶哉是書不求新異難得之藥尤便於通行者矣

竹垞藏元人鈔本按其目僅二十卷爾殆經後人選擇

七政推步

七政推步七卷明貝琳撰琳字宗器號竹溪拙叟其先爲浙之定海人祖可父永阜明初以戎伍至應天遂爲



上元人居官賢街琳幼發奮思脫戎籍遂往北京投太僕寺卿廖義仲欽天監五官靈臺郎臧珩司**厯**何洪求天象之學得充天文生正統己巳邊警監正皇甫仲和薦琳命隨昌平侯楊洪至獨石景泰庚午隨總兵石亨抵賀蘭山壬申隨左都御史王翱征瀧水其占候多有功授刻漏博士天順改元因天象示警奏對稱旨賜綵緞白金陞五官靈臺郎成化庚寅陞監副壬辰改任南都與弟珙居武定橋西庭植絲瓜一蒂相連而異瓣觀文僖公謙以文賀之以張九齡庭木連理崔希喬室生芝草爲比自琳以天文起家次鵬次仁次幽次尙質次

元禎七世以天文與明相終始幽字西山著**厯法要覽**十二卷**厯書**小帙數種康熙中有名國珍者與梅定九交善其**厯法**諸書定九多所採擇故**厯算書記**云回回**厯法**刻於貝琳其布立成以太陰而取距算以太陽年巧藏根數指此書也貝氏爲金陵天文家乃志乘漏其名氏惟路鴻休明代人文略言之最詳琳書得采入四庫惜幽書不傳慈谿張景陽云貝先世立本仕南唐至常州刺史賜錦衣魚袋宋開寶閒吳越克常州被流定海守志不渝常服舊賜錦衣時人呼爲南唐錦貝考馬令南唐書云吳越圍常州軍使余成禮劫刺史禹萬



詩書志 卷四  
誠以降陸游南唐書云吳越攻我常州權知州事禹萬  
誠以城降並無貝立本事或貝卸任仍居常州以禹權  
事禹被劫而貝不屈獲罪未可知也

### 緯略

齊東野語程文簡著演繁露初成高文虎炳如嘗假觀  
稱其博瞻其子似孫續古時年尙少因竊窺之越日程  
索回元書續古因出一帙曰繁露詰其閒多文簡所未  
載今繁露詰不可見惟緯略瑟瑟條云程氏繁露援唐  
語林盧昂瑟瑟枕世所傳瑟瑟或皆鍊石爲之續古引  
明皇雜錄當是珠類又引虢國夫人事物類相感志博

雅杜陽雜編陳陶詩王翰林詩宋景文公詩言以證之  
又養和條程氏繁露載李泌事續古引皮日休送魏不  
琢烏龍養和皮陸皆有詩以證之洵足爲文簡之助緯  
略排比事類多半取相同者廣徵博引而罕有詰難故  
其舛誤亦稀然如水仙賦引金樓子云劉子元爲水仙  
花賦時人以爲不減洛神賦余不敢望知幾萬分之一  
按金樓子乃梁元帝所作劉子元與唐人劉知幾作史  
通者姓名偶同續古牽合爲一人非也吹劍錄譏其蠚  
略以林和靖草泥行郭索作杜詩錢辛楣譏其刻錄謝  
幼度初爲征西將軍桓豁司馬脫下四字甚哉博洽之



難言也

秕言

秕言十卷明鄭明選撰明選字侯升歸安人萬曆己丑進士南京刑科給事中有詩文集三十卷此書附刻明博洽莫如楊升庵其丹鉛總錄諸書不無疏舛陳文耀正楊張萱疑耀互有得失胡應麟少室山房筆叢焦弱侯筆乘亦號淵雅此外研索古義者頗少此書徵引載籍考證故實皆有根據其中糾升庵之誤詞氣和平不涉囂爭尤足尙也明詩綜盛稱其詩採至四十餘首而不言其博學或偶未見此書歟

臺閣名言

臺閣名言六卷明張合懋觀撰合一字賁所江甯人十六寄籍永昌嘉靖元年領雲貴鄉解第十一年進士官至湖廣按察副使爲戶部侍郎南園先生志道之子戶侍有南園漫錄十卷續錄十卷此書自憲典人物至利用錄事凡二十八門原名寅載石城許穀更題其首曰臺閣名言並爲之序羅璧於拾遺引萬見春云公羊穀梁皆姜字切韻腳疑爲姜姓假託懋觀謂公穀不如左傳核實有何畏懼而隱其姓戴宏序載公羊五世之名姓纂亦謂下邳有穀梁氏且如從祀諸賢巫馬漆雕



今日皆無亦可指為某韻脚而隱其姓乎引漢書證論語能以禮讓為國乎何有國子下俱有於從政三字皆明確有據惟以子見南子為公子郢字子南子路仕輒故不悅此則不免穿鑿耳其紀載時事如楊一清馬理湛若水等俱不諱其過亦明人雜家之翹楚也合之兄含愈光正德二年舉人以詩名揚升庵有禺山詩選懋觀有賁所詩文集罕傳本滇南詩繫收懋觀履影詩亦從此書採出

分門古今類事

分門古今類事二十卷分十二門曰帝王運兆曰異兆

曰夢兆曰相兆曰卜兆曰讖兆曰祥兆曰婚兆曰墓兆曰雜兆曰為善而增曰為惡而損據卷八先大夫龍泉夢記稱崇甯乙酉拔漕解次年叨第末署政和七年三月宋如璋記又任豫交代條云任豫青田人與余先君友善崇甯二年登第至崇甯五年先君亦登科則作者為宋如璋之父張鑑仕學規範首列編書目云古今類事委心子撰蓋作者不以姓名著也其人生北宋南宋間博采廣引每條注明出處多世所不傳之書李昉該聞錄所載蜀五代事吳任臣十國春秋未能徵引謝彥夫詩王巖古松詩湧泉觀詩送陳昭文赴舉詩王觀文



仙桂詩名賢小說王處厚古柏吟成都集記朱長山苦  
熱詩皆可補全唐五代詩之闕其餘北宋人遺句尤夥  
紀異錄宋齊邱以博堠里大密密唐說徐知誥潘佑集  
載鍾輻事謂輻係周世宗都洛時進士洞微志謂盧絳  
行刑者姓白與諸書不同祕閣閒談江南進士邱旭錢  
希白小說秣陵進士許驥南唐史魏清於張洎座下及  
第亦馬陸龍袞鄭文寶所未載至宋明帝封湘東王孝  
武爲開宅邸方鑿池獲赤玉二枝及入朝乃居西邸建  
平王景起宅在建陽門外始成詔以一宅換之自西邸  
移入新宅河洛讖云靈曜豫見東南隅而二邸皆處宮  
城之東南在巽地蓋天應之也云出宋明白敘則六朝  
遺文尤爲世所未覩矣

### 六帖補

白氏六帖以宋單行本爲最佳合孔傳所作爲白孔六  
帖乃明刻也楊伯岳六帖補二十卷傳本甚稀伯岳字  
彥瞻亦號泳齋爲和王沂中曾孫嘗以工部郎中守衢  
州呂午序稱其知雲璈字出太平廣記按樂類八琅之  
璈引續仙傳漢武內傳是也其書凡白孔所有卽不復  
出故每類多不過二十餘條少或五六條如引萊州圖  
經隋世二人居牢山食松久肉色與松同人呼爲青翁



文房寶飾毛重教授於導江春日主人宴賦散語勸以  
 陸源酒賞以柳棉肝及林逋詩三招不見山中溼擬盡  
 軒昂太白星之類亦多諸書所未采張循王之曾孫鏊  
 有仕學規範南湖集楊沂王之曾孫伯岳有九經韻補  
 及此書皆賢王孫也岳忠武之孫鄴侯珂有金陀粹編  
 玉楮集至所刊九經三傳其有功於經更鉅矣

嘗廣六帖為盛氏  
 十二帖惜不傳

唐盛均  
 泉州人

至正直記

至正直記四卷元闕里孔克齊撰克齊字行素一字靜  
 齋至聖五十五世孫祖宗善為建康路教授父文昇字

退之為建康書掾因家岳山克齊贅於沈氏憲司薦授  
 黃岡書院山長召為國史編修楊文舉佩玉齋類稿孔  
 肅夫自然亭詩序云尊府上元君居溧上山山之陽文  
 舉又為其妹墓誌云孔子五十三世潼孫去永嘉來江  
 東後辟建康路儒學教授故亦家建康又二世而余妹  
 歸之為上元縣尹承事公之冢婦龍興路儒學正友益  
 之妻直記先父教諭一條載建康取補書吏事甚悉文  
 舉稱肅夫為上元君公子是上元縣尹之子然至大金  
 陵新志上元縣尹不及載故未詳其名肅夫友益與靜  
 齋為從父兄弟直記云吾親友楊文舉子元碩其非妻



兄可知若肅夫或卽友益之子未可知也靜齋憤時嫉俗於閨門閭里過失無所隱諱欲取爲家戒往往不免盡言之失然於一人能言其所短所長亦使是非不相掩也書中多金陵軼聞於溧上尤詳

至正直記云古之賢母載之方冊不爲少矣且以目所見者一二言之金陵王勳字成之世爲儒學門族僕其母甚賢先祖傳授時勳尙幼母令其侍奉讀書每訓之曰汝親近官人學做好人我當紡績供汝衣食且買書與汝讀他日識得幾個字免得賤隸我含笑人地下矣先祖聞之遂令勳受讀日侍先人於學舍旣長試吏後

至府架閣爲母求墓銘翰林趙子昂書字勳生璧字長文今爲州案牘官溧陽徐生本刀鐮者其妻昔爲故家之妾旣娶而改業及有娠乃屬其夫遷居鄉先生李仲舉之鄰且曰令子在腹中日聞讀書聲必能若是也後生子朝顯字公達自五六歲時卽能記誦千餘言長而習舉子業此母之所訓也又嚴儒珍隸卒子也幼孤母訓其讀書從湯景賢學至正辛卯中進士第授分宜縣丞今辟江浙行省掾史上虞謝生世爲隸卒之役鄉有故家葉氏女貧而孤下嫁於謝之祖旣娶而家道日興生子變其習後諸孫皆知讀書學儒者事此亦母之遺



訓也又有宣江漢景明父也幼失母從父寓居溧陽依繼母養及九歲父卒母訓之曰汝母早亡吾養之無異心今汝父又死汝勿以吾繼母有外心吾固甘心守節而待之漢拜而受訓其母後擇賢師而教躬紡績助其薪水子亦不違母意日則勤讀誦之功夜則盡溫清之禮遂成儒業鄉人無不讚歎母再無他志爲終身焉溧陽蔣氏相傳義興負村之裔家雖貧窘讀書尙禮不怠其志後生子文秀富且母賢訓習舉子業累科不第至正間納粟補官雖爲鄉人之誚因才後擢憲職厥族有居湖墅者漸成消廢惟荆溪州中樓下一族頗師事書

業又宣城王德輝其父無子納姚爲妾正室薛爭如不已越三年夫喪薛議出妾妾曰且勿嫁有娠後果生德輝薛則撫育過於養母旣大擇師肄業至正戊子登第此則嫡母之賢訓也高昌僕哲篤世南以儒業起家在江西時兄弟五人同登進士第時人榮之且教子有法爲色日本族之首世南以僉廣東廉訪司事被劾寓居溧陽買田宅延師教子後居下橋世南有子九人皆俊秀明敏時長子燾本名傲年將弱冠次子十五六餘者尙幼每旦諸子皆立於寢門之外省謁父母非通報得命則不敢入至暮亦如之一日子予造其書館館賓荆溪



儲惟賢希聖主之見其子弟皆濟濟有序且資質潔美若與他人殊者蓋體既俊秀又加以學問所習氣化使之然也予深羨慕之既而欲遣一生通於世南求跋二小畫卷希聖曰姑少待有宦者出中門可問之則主者出矣否則別託門子轉相通報亦可諸生則不敢妄入也予初疑之希聖曰世南處家甚有條理僮僕無故不入中門子弟亦然自吾至館中因知諸生居宿於外者昏定晨省皆候於寢門之外非奉父母命則不敢入蓋謂私室中父母處之或有未謹者則肢體袒惰使子弟窺見非所宜故亦防閑之也予始服其法之有理深慕

之嘗爲家人輩言之因外家處事太無理雖幹僕亦得入於寢室告報家事予深惡之每以楔事之法諭之也予家以先人遺法亦頗若是惟防閑外居子弟未嘗及於諸子也楔氏之法不可忽他日歸鄉當謹謹效之云愚按和丸畫荻均自名門宜其彤管之有煒也是集所采賢母事蹟多出單寒要足爲教子者勸附楔氏家法誠以溧上舊族又與瑯琊顏氏先後相輝映焉

### 櫟翁稗說

櫟翁稗說四卷元高麗李齊賢撰李穡作齊賢墓誌云忠肅王薨政丞曹頤脅百官屯兵永安宮宣言逐去君



側惡小陰爲藩王地忠惠王擊殺之而其黨之在元都者必欲抵王罪齊賢曰吾知吾君之子而已從之京師代舌以筆事得辨析既還羣小益煽屏跡不出著櫟翁稗說今觀其書多敘東國遺獻及詩話翰墨不言朝政時事所載中國宋元人佚句亦夥如王元澤絕句水邊山映碧紗窗松下圖書滿石牀外客不來春正靜花閒啼鳥送斜陽爲宋詩紀事所未收也

### 梅仙觀記

梅仙觀記一卷宋仙壇觀道士楊智遠編首爲梅仙事實漢南昌尉梅子真也成道於飛鴻山號爲梅仙山在

洪州豐城有唐羅隱梅先生碑後俱燬宋咸道六年道士熊應祥復新之碑再立大山蕭山明小山蕭泰來書碑陰及後元豐五年敕封壽春真人有尙書省牒紹興二年封壽春吏隱真人有敕牒又贊一首詩四十二首作者三十八人如陳闡朱粹嚴椿齡呂防張景先范仁仲王時彥劉霆午甘邦俊王伯範張廣漢鍾詵胡發吳季先鄧夢杰趙必樞曹仙家張異范太中蕭泰來朱行文王時彥羅永之胡宏子崔次周李君式薛修竹諸姓名多宋詩紀事所未采洪龜父朋詩紀事但載其蝸角鵬背龍鱗蟬蛻兩聯永樂大典錄其詩一百七十八首



此詩亦佚今載其全篇云炎靈失其御四海無安稅烏  
乎梅南昌脫屣元始歲小臣披肝膽宮掖事嚴祕上書  
竟渺茫棄擲江湖外一朝厭蝸角萬里寄鵬背向來殺  
青士此事美無對到今瑤池地風露翔孔翠仰瞻神界  
遊千載想生氣願爲龍鱗嬰勿學蟬骨蛻又馬內翰子  
才詩二十六韻有云浮雲去無蹤世人以爲仙蓬山在  
何處此事且勿論但愛清風高凜凜久益新皆詩中之  
警策者也

開有益齋讀書志卷四

終



卷之三